

न्यौली-संकलन

‘न्यौली’ वस्तुतः उत्तराखण्ड के पहाड़ी इलाकों में मिलने वाला एक छोटा सा जंगली पक्षी है। गर्मी के उदासी भरे दिनों में दूर जंगलों से आने वाली "न्यौली" की आवाज सुनने वाले के मन में एकाकीपन और विरह का भाव पैदा करती है। पहाड़ी जंगल में घास काटने गई महिला या अकेले गाय चराता पुरुष जब अपनी मन की पीड़ा को गीतों के माध्यम से सामने रखता है तो "न्यौली" गीत पैदा होते हैं। उदासी और विरह इन लोकगीतों का मुख्य भाव है, साथ ही इन गीतों में सामाजिक सन्दर्भ, प्राकृतिक विषय, खेती-किसानी और दार्शनिकता भी दिखाई देती है।

किसी एक पहाड़ की चोटी पर गाई जा रही "न्यौली" के प्रत्युत्तर में दूसरी तरफ से उठने वाली न्यौली का प्रस्तुतिकरण सोशल मीडिया के इस दौर में थोड़ा बदल गया है।

यह संकलन इस सामाजिक बदलाव को 'हाइलाइट' करने का प्रयास है।

प्रस्तुतकर्ता: हेम पंत

सोशल मीडिया की सार्थकता

Facebook में "कुमाउनी शब्द सम्पदा" ग्रुप की एक पोस्ट पर सदस्यों द्वारा पोस्ट किए गए उत्तराखण्ड के पारम्परिक गीत – न्यौली और जोड़ का संकलन



नयीली संकलन



Hem Pant

सोराक सड़कपन मोटरों घुराट
कांकि छै तू चेलि बेटि, कां तेरो सोरास?



Hem Pant

हल्द्वानी का गोरु बाकरा, कालढूंगी चरान
जां तेरो आंसि को बाजो वां मेरा परान



Anil Karki

बत्ती बाले बरीख में दी बाले कुना में ।
उमर न्हे ऊब हुना में जोबन रुना में



Risky Pathak

धानकी बाली पिंगली भैछ... ग्युं की बाली ठाड़ी....
त्वे सुवा कारण मैले घर कुड़ी छाड़ी...



Risky Pathak

बाकरी को बाग ल्हिगै, पाठो चिचानै में...
त्यर म्यर मरण है जो एक तिथानै में....



Tara Singh Chuphal

सरग लागो काल बादल धरती सिंलैछि
नूण कैसि माया मेरि हयूं जैसि बिलैछि



Tara Singh Chuphal

गंगा ज्यू बगडै में दवी झैणि बंगाली
पाठक ज्यू तुमि लेग में जास भ्यछा माया क कंगालि



Hem Pant

दूध की कसिणि में छ चनर की माया
जसि तेरि पानी तीस, तसि मेरि माया।



Nandan Pokhariya

उन खोली बाटो लायो भैंस की थोरी ले।
क्वै दुःख देव ले दिया, क्वै मेरी खोरी ले।।



Risky Pathak

रात भली जुन्याली,, ऐ जाँ कीड़ा उड़नी....
यो पहाड़ आग लागो, मी दुंग बुड़नी....



Nandan Pokhariya

नैनीताल की नैना देवी झाकरी क सैम।
मेरी छ हँसन्या बानी लोग खानी भैम।



Nandan Pokhariya

झौल पड़्यो झलकन दीछ हिमाल को घाम।
भ्यार जान भीतर जान तेरी ऊँछी फाम।।



Hem Pant

बाल पिंगलो, नाल हरियो जजुरालि बांस
झिट घड़ि बसि जाए, बुति बारों मास



Anil Karki इसका एक वजर्न और है -
ग्यु हरिया जौं हरिया जजुराली बांस /
एक बाटुली दिन लाये एक बाटुली साँस!



Anil Karki

सरग भरी तारा छन एक तारो आगै हो
दुःख दुःख किलै कुछी दुःख त लागै हो !....



Nandan Pokhariya

दवी आया वर्मा सिपै दवी आया बाजारी।
तेरी मेरी बैठनी जागा फूली रे हजारी ।।



Anil Karki

सरग भरी तारा छन एक तारो आगै हो
दुःख दुःख किलै कुछी दुःख त लागै हो !....

नयीली संकलन



Nandan Pokhariya

रामू गाड़ा श्यामू धान गीलो जन गोड़िये।
नानछाना लाछे दोस्ती अब जन छोड़िये।।



Hem Pant

सरस्यो फुल्यो ढकबक, धनियां फुल्यो रंग
त्वै सुवा जाइयां बटि, मन मेरो उड़भंग।



Risky Pathak

हाथ गल्या में कानो बूड़ो गाज्यो कुमरी को..
त्वे सुवा कै पाप लागलो मेरी पराणी को....



Nandan Pokhariya

धार में देवी को थान दूध ले नवायो।
तेरो जूठो में नी खॉति माया ले खवायो।।



Hem Pant

गिलास को ठंडो पाणि, रुमाल को साया
चिट्ठि में जवाब दिए, बाटुलि में माया



Hem Pant

बर्मा जान्या रेलगाड़ी, मथुरा जान्या कार
बची रौला भेट होलि, मरी जौला तार।



Gopu Bisht

काटी हाली खिना, लाडिलो दयोर हुन्छे मायदार भीना।
हौंसिया प्राणी तेरी, भौकुना न्हातिना।



Gopu Bisht

क्याल खाया नारिंगा खाया, क्या करू खाएं ले।
डीठ पडछी भेंट न हुनी, क्या करू माया ले।



Nandan Pokhariya

द्वी मुठा पराल उड़्या वायु वतास ले।
त्वे बैना बचन सुनी आयूँ अतास ले।।



Nandan Pokhariya

पारी भटी ईजर खण्यो कुली कुमार ले।
मेरा आँसू पौछी दिये हरिया रुमाल ले।।



Gopu Bisht

वार भटी पार देखी छः धान काटया पसौर
मुख तोड़ी छोड़ी गेच्छै पाप लागौलो मेरो।



Devendra Nainwal

मि बाखरा का ग्वाला सुवा तु इन्टर पास,
कि त दिजा मुनड़ि निसानि कि दिजा आस



Nandan Pokhariya

खेत का किनार मनी फूली रयान काँस।
आगास उड़निया चढ़ा मेरा ईजू काँछ।।



Gopu Bisht

खाण पीण होटल क, बिछुना दरी को।
काम यौसो करी जाए, उमर भरी को।।



Jogasingh Kaira

गाडे की चिफई दूंगी को दूई तेकूलो
सुवा मेरो परदेशा के चिट्ठी लेखुल ।



Nandan Pokhariya

आगास को काला बादल घुड़ घुड़ घुड़कँछ।
हिया में नासूर है गयो सुड़ सुड़ सुड़कँछ।।



Jogasingh Kaira

बानरा लुफम बलि बानरा लुफम
वखता बेमान हैगो तिरिया हुकुम।



Gopu Bisht

बाटा गाड़ा धान बोया, ओ घिगारु की बाड़ा।
त्विले दैछ यो गैली माया, ओ मै मारू छू डाड़ा।

न्यौली संकलन



Gopu Bisht

हे गोरख्या पल्ट टेडी टोपी, हे पुलिस क गाडी।
कैको पाल जन पड़ौ, हे त्वि पापी दगड़ी।



Nandan Pokhariya

गाड़ा का बगड़ पनी भुरभुरान मेल।
दुफरी को घाम लाग्यो, न पानी न सेल।।



Nandan Pokhariya

गैल कुवा सिमारै का पिछौड़ी रूजूंलो।
आँसू पोछ्या रूमाल ले, मन क्याले बुजूंलो।।



Nandan Pokhariya

काली बाकरी बन लैछ बन की बनै छ।
कै थै क्यो कुना हुन्या हो, मन की मनै छ।।



Godhan Singh Bisht

गोरख्या पल्टन टेडी टोपी पुलिसा पगड़ी !
जतिला मरन होलो दुस्मना दिगड़ी !



Asha Upreti

सानणै की ढेकि सुआ, सानणै की ठेकी
बुड़िया होलार लागि घुना. मुना टेकी ।



Mohan Chandra Joshi

हपुर बजानीधुरा,द्विछन बंगालि।
एक तु छै एक मैछुं,माया का कंकालि।।



Deepak Mehta

हे बरखा लागी अरखा गरखा, पाखी दनवारी चर्वीछ।
जैको स्वामी.... परदेशा...., उ जागा-जागा रवीछ।।



Jogasingh Kaira

धन धन भाईलोगो तुमरि जै जै कार
अजर अमर रया तुम गोपीचने चार। ।



Pushakar Tatrari

नाशपाती कलम करी.आडू कि नकल
गलती होली माफ कराये लौंडिय अकल



Pushakar Tatrari

काल गंगा को काल मछ बलूवा बूकूछ
योउ माया बज्युनि हैज कलेजी सूकूछ



Devendra Nainwal

सकी ग्यान हयूंना का दिना आब पड़ला घाम,
त्यार बिना कसिकै रूँलो सुवा,म्यार करियै फाम।



Tara Singh Chuphal

काल काला काफल टिप्या द्वी हाथ का रूवीना
दिन भेट हुनैकि छै नै राति आये स्वीना



Jogasingh Kaira

गाडे की दूंगी छ्जी फुलिया कांसे ले
तौखुटी मैकुणि खाली हीटछे ठासे ले



Gopu Bisht

इतू लंबी चैत बैशाख, कतु लम्ब जेठ।
दिन बारा उनै रौला, हुनी रौली भँठ !! हरे हर



Risky Pathak

आज मुरली कैकी बाजी चौमासी ग्वालौ की...
जै घडी समझ पड़ो, पाताल छिरौ कि...



Tara Singh Chuphal

बनै काटो बनै ताछो सलाको भराण
ऋतु कैसि सुणा ग्यैछा पन्त ज्यू जी रवो प्राण

न्यूली संकलन



Hem Pant

भूख लागलि भोजन खाया, घाम लागलो बै जया
बचि रूला भेट होलि, सुकार्या रै रया।



Tara Singh Chuphal

बाटे में दुकान हाली भोटिया शौकलि
तुमि संग भेट भैछ फेसबुका मौकालि



Pushakar Tatrari

आसमानी जहाज उड़ पाताल गौ राट
जै घड़ी समज उछी आँसू को तौडाट



Pushakar Tatrari

वंशी बाजी टुनटुन मुरली जोरैक
बोली कूछि मेरा गुकि लब्ज शौरैक



Tara Singh Chuphal

पार्युनि इजर गाड़ो दूवी जैणि बौसिया
तुमि जैसा गिदार हुना में जास हौसिया।।



Gopu Bisht

शेरघाट की लंबी पुल, कील ठोकी घन ले !
मुख बोलना मैली नि छोड़, यो सब करछौ माया ले।



Basant Upreti

सालो को बुनिया सुआ, सालौ को बुनिया
उधार में बल्द लार्यौ उलै पुछड़ झडिया



Tara Singh Chuphal

पार्युनी बर्यात ऐछ सोर्याल विष्ट
पैं शबद म्यर अफड़ ईष्टैकि



Tara Singh Chuphal

सिलघड़ी का पालचाला झुमुरैकि नलि
दैण होये भागलिंग बूबू दैण तेरि खलि



Tara Singh Chuphal

माछा मिठा मस्यालाले चहा मिठ क्याल
आंसू पोछूं रूमालले हिया पोछूं क्याल



Jogasingh Kaira

हिदी को लागी दुःख कैहिं कसिके कूं
जब ऐछ याद सुवा मुख ढकिबे रूं।



Rajen S. Sawant

उड़ पन्छी हरेवा स्याप, बस पन्छी गरुड़,
जे आंखर तम कौला, फरकूलो जरुड़।



Rajen S. Sawant

भात पकून्या ताँमै तौली, पस्कून्या चमच,
तमारो आंखर म्यारा, नि आई समझ।



Rajen S. Sawant

धार में देप्ता को थान, खै हाल्यो प्रसाद,
में त ज्वाड़ा भुली गैछ्यौं, जगै हैचा याद।



Hem Pant

हित हो सालि खेत खिन, खेत में पानि नें
तेरि दिया मुनड़ी भिना, आंगुला जानि नें।



Hem Pant

हापुर सड़क पनि बाकरी का खोज
कभै कभै हँसि उँछि, रूनि उँछि रोज



Jogasingh Kaira

जो बाटा मैबुआ आला जगी जो दिवाई
जबाटा सौरासी आला फूली जो भंवाई।

न्याली संकलन



Jogasingh Kaira

सेर भरी शिकार ल्याय पौ भरी मस्याला
तेरी नामेंकी चिठ्ठी लेखुलौं घर वाला रिशाला



Tara Singh Chuphal

बासमति को भात हुनु, घ्यू हुन खडैकि
त्यर म्यर सफर हुन, रेल हुन जनैकि



Jogasingh Kaira

मेरि काखि हरुलि काखि जंजीरै तीनै पाल
अल्मोड़ा गुदाम च्याला बाजुरो सकि जाल



Jogasingh Kaira

माँणि माँ मडुवा भरो नाइ में मादीरा
कति बटि माया पड़ी दूनियाँ खातिरा।



Hem Pant

उड़न्या भंवर बैठयो फूल का बाल्या में
इतुक माया किले पड़ी, बिराना च्याला में।



Jogasingh Kaira

धान बोया धन्याड़ी माटा ग्यों बोया गिलम
मेरि सुआ ठाडी रैछे तू म्यारा दिलम



Hem Pant

कच्चा बास्यो चण्डाक में, घवाघा हैग्या औत
खानि पिनि कै न्हातिन, माया पड़ि भौत



Rajen S. Sawant

लंबा गाड़ा तीखा चाला, बोई हाल्या भट्ट,
तम भाया हौसिया ज्वान, में भयूं निरो लट्ठ।



Tara Singh Chuphal

इति लम्बी काली गंगा कै छांजर छिरि
जान्यो होकि माया मारी उन्या होकि फिरि



Gopu Bisht

हल्द्वानी को पल्ल तरफ, नेपाली को ड्यार।
हित सुआ नैसी जानू, क्या छः त्यार म्यार।



Saroj Anand Joshi

लूघाट हे बगी आयो चंडाक में फोड़ीं
देख बामण मेरी कुंडली माया किला तोड़ी



Nandan Pokhariya

थाली भरी खीर खायी घीय की बासि ले।
डाणु काटी पार आयूं में तेरी आसि ले ।।



Nandan Pokhariya

काली गंगा निसुरी भैछ, बड़ी का सेल ले।
जोबन खायो परदेसी ले, धन खायो रेल ले।।



Saroj Anand Joshi

असमान जहाज उड़यो बम्बई शहर
या त सुवा मेले लेजा या दीजा जहर



Nandan Pokhariya

चर चर चुनलि भैसी चरान तेरो हो।
तै डाणा उड़न्या पापी परान मेरो हो।



Pushakar Tatrari

ताल गड़ा घोगा बोया माल गड़ा मेथी
भोल पौरहि नैइ जूला को बैईरल इति



Rajen S. Sawant

ऊंचा ढांडा हिमाल में, हयूं पड़यो बरफ,
पंख हुन्ना उड़ी ऊनू, तुमरी तरफ।



Nandan Pokhariya

काली पारे को सुको डाणू नै उधरि जानू।
न हियो पत्थर हुनू नै बिसरी जानू।।

न्यूली संकलन



Saroj Anand Joshi

काटना काटना पत्नी उँछ चौमासी को बन
ओलि.....बग्न्या पानी थामी जाछ ने थामीनो मन



Saroj Anand Joshi

अल्का धूरा सीतू रानी पानी कहा पीनी हो
ज्युना छन इसी माया मर्या कां जानी हो ...



Devendra Nainwal

बाँजानि धुरा हिंउ पड़िगो नन्देबी को थान
चिट्ठि ल्येखी जबाब न्य दिनै, बाटा में करछै सान !



Nandan Pokhariya

दाँत ले फुटन्या उखड़ जुम्ला पारी हुँछ।
अर्खा को मन बुझून्या आफी किलै रूँछ।।



Nandan Pokhariya

पहाड़ में घाम आयो बगड़ में सेल।
कति कसो कति कसो कुदरती को खेल।।



Pushakar Tatrari

मैनीताल की नंदा देवी शोर की भागवती
मै हिन दयालु होया सब हिन लखपति



Pushakar Tatrari

पार्वती को मैत छ या शिव को सौरास
हिमालय का वार पार देवताओं का वास



Nandan Pokhariya

चम चम चमकँछी त्यार नाक की फुली।
धुरा में धकेली भैछे जनि दिसा खुली।।



Nandan Pokhariya

गोरू धौला बाकरा धौला नौघर हरि का।
इस दुःख पड़ी ग्यान जनम भरि का।।



Nandan Pokhariya

ऐला भैंस को ल्है जान्छै काली कुमर में।
खुटा काणु जन बुड़ो बालि उमर में।।



Pushakar Tatrari

ऊँचा धुर पून्यागिरि हाट की कालिका
ध्वज मै छू जयन्ती मैया शोर की मालिका



Pushakar Tatrari

गोर धेनुवा भैंस धेनुवा कस्कै का टु घास
ईजु की लाडली चेली मैत को निश्वास



Jogasingh Kaira

रातिपरे कि राम राम व्याखुलि की सलामा
तिकणि आँसू ढोक लगुंनी जभत ऐजेँ फामा।
..(स्वरचित)



Pushakar Tatrari

चन भैसी को चन खुरा नाम को उसारा
मेरी जैसी गैली माया हेम पंत ज्यू जन दिया दुसारा



Jogasingh Kaira

उचा डान गाड़ गध्यार तिमली को फेरा
त्यार भरोस जुग बिताय मैल रो रो बेरा ..(स्वरचित)



Pushakar Tatrari .

घास काटन बन गयू 'काटि ल्यायु न्यार
कसीके मनाली ईजु बीन चेली को त्यार



Jogasingh Kaira

बाली तनेकी बाली उमरा के रूडी के ह्योना
जती जंछी वती ऐँछि पुन्यों जसी जूना । (स्वरचित)

न्याौली संकलन



Tara Singh Chuphal

चार पाई का चार कौना छटक मच्छर दानी
अलबहुरिया मन हैग्यो उदासी प्राणि



Jogasingh Kaira

रातो हणी हरे जैछ दिने की यो छाया
तन छुटो धन छुटो छूटीने रुखी माया। (स्वरचित)



Jogasingh Kaira

लामी धमेली लटी परा टसर क फुन
यो माया यसी पड़ी पड़ीगे अनाधुन ।.(स्वरचित)



Tara Singh Chuphal

सिलघड़ी का पालचाला, नस्यड़िक साल
धाग हुनु टोड़ी दिन्यूर यो मायाक जाल



Tara Singh Chuphal

वढ़ना वड़ना जाड़ हुंछ, बर्मा कमलिले
रात नीन दिन भूख नै, तेरा अमलिले



Jogasingh Kaira

रातों हणी हरे जैछ दिने की यो छाया
तन छुटो धन छुटो छूट नै रुखी माया। (स्वरचित)



Tara Singh Chuphal

समधुरा सड़क लागि छोटि हैगे दिवाल
लेखि पढ़ि के नै हाति क्या दिछू सवाल



Risky Pathak

हपुरा बाँजाणि धुरा, बानरैकी चौकी....
माया लाँछै डबलों की , बोली मार छै सौ की...



Hem Pant

गंगा ज्यू का रैवाड़े में सरप (सांप) ले नायो
निर्मोही सुवा त्विले, फरकि न चायो।



Hem Pant

बाट मल्लि कटान लाग्यो, बाट तलि चिरान
चिट्ठी पढ़े खल्दि हाले, लिफाफा सिराण।



Jogasingh Kaira

मेंले मरी जाण ज्युवे गेलु की मुनइ धो दिए ।
तेरी आमा दूध तताली तू गेलु दूध मांगिए ।



Jogasingh Kaira

मलि बटी बगी आयो शिवो क त्रिशूला
मिकै सब माफ करिया नि पढ़ इस्कूला ।



Godhan Singh Bisht

ठोकनि निसान छोरी ठोकनी निसान
तेर पछा पड़ रयों ज्या कछें निधान



Pushakar Tatrari

जल्दी पिस हल्दी भागी जल्दी पिस हल्दी
बुडिया ले बूढ़ा मार्यो बूढ़ लूक खल्दी !||



Godhan Singh Bisht

अल्मोड़ा बै गाडि चली पुजी गै पनार
भुलि जूनौ दाँत पाटी नै भुल्लू अन्वार



Godhan Singh Bisht

मल्लिया बटि जोगी आयो सुनू कै सगड
छोडि द्यूने कारबार न छोड़ दिगड



Jogasingh Kaira

एक थालीमें घ्यों खिचड़ी आल गोबी को साग
हिर्दी को सुवा मेरो कैल बनायो बाग ।

न्याली संकलन



Tara Singh Chuphal

सिलघड़ी का पालचाला छोलनी हलद
जथ जौल संग जौल ततराड़ी ज्यू जोड़िक बलद



Tara Singh Chuphal

मुनैड़ी नगन पनज्यू, मुनैड़ी नगन
हौसिया प्राण मेरो, रै नै सकन



Jogasingh Kaira

मुरुली की धुन सुणि धार वार पार
मन मेरो भरी आयो दिल तार तार।



Tara Singh Chuphal

हुमधुराको हुमनिगालु द्यो धुरी को द्याल
एक बाटुलि राति लाये एक बाटुलि ब्याल



Jogasingh Kaira

डान कान बुरुसी फुली गधेरिन काँस
तुम गया परदेसा म्यर मन उदास



Godhan Singh Bisht

शिकारि ले गोली मारी तालमाला खन्दक !
त्यर पछिला छोडनिया नहात्यू जिन्दगी छन तक !



Tara Singh Chuphal

निगालु की सेटी निगालु सेटि
भवल मरी नै जौल को बै रौल एति



Godhan Singh Bisht

हपुरा बाजाँडि धुरा बाँजाकी हवा छो !
आजा का जायाना बटि कबाकि अवा छो



Tara Singh Chuphal

बाटै में काफलै डाई काफल टोडी खूल
जन सुखिये पहाड़ो पाणि में पहाड़ै रूल



Tara Singh Chuphal

घुर घुरा घुरकन लागि सोर जान्या गाड़ि
जोड़िदार बिलौज ल्यूल मायादार साड़ि



Jogasingh Kaira

नाना म्यारा भुखे रौला निल्याया उधार
तो मुखडी मैकुं खाली भौते माया दार । (स्वरचित)



Jogasingh Kaira

घर छोड़ द्वार छोड़ नौकरी में जोर
मतिम फरक पड़ अकलि में चोर । (स्वरचित)



Risky Pathak

हरिद्वार में हर ज्यू रूनी, झांकर में सैम...
तेरी मेरी हसन्या चली, लोग खानी भैम



Risky Pathak

बाटा गाड़ा धान बोया, घिंगारु की बाड़ा....
त्वीलै दी छो गैली माया, मैं मार छू दाड़ा...



Basant Upreti

बार बाजा नैनीताला, एक बाज्या थाणाँ में,
मवाया जसी पाकी रै छै निं ऊनी खाणा में ।



Godhan Singh Bisht

नारिन्गा की बोट मूडि नरिन्गा की बासा
कि तो हुनी मनकसी कि है जानी लासा



Rajen S. Sawant

रस्सी बाटि उदालै की, ओ हुड़का मोडै जन
ओss हाथ जोड़ूँछु टोपि गाडुन्छु,ओलि माया टोडै जन



Nandan Pokhariya

ध्वज धूरी को काला पाथर बीच फुटो जन।
त्योर म्योर जोड़ सुवा, कभै छूटो जन।।

न्याली संकलन



Nandan Pokhariya

रीठा दानी भुर भूरानी बयाला ले झड़ झड़ाछिं।
साँस पड़ी निसास लागो हियो किले फड़ फड़ाछिं।।



Nandan Pokhariya

गंगा जी का बगड़ में घिंघारू को बाढ़।
मेरी जैसी माया हुनी तैं मारनी डाढ़।।



Nandan Pokhariya

रून झून बाखा लागी किलैडी का पात में।
जा जा चिट्ठी जानी रयै म्यार स्वामी का हात में।



Nandan Pokhariya

पारी भटी का निंगाल झापा बखा लागी चूनान।
पैली कूनान भर्ती भर्ती दःख लाग्या रूनान।।



Nandan Pokhariya

घास काटन हाथ कट्यो कैचनी रकत।
मेरी माया राखी दिये हँसनी बखत।।



Hem Pant

जई फुली, चमेली फुली, दैणा फुली खेत
तेरो बाटो चानै - चानै उमर काटी मैता।



Mohan Chandra Joshi

हुणदेश है हुणियाँ आयो जाँठो टेकि,टेकि।
तेरि कुड़ि को बौलो कर्यो दुनियाँ देखि,देखि।।



Tara Singh Chuphal

काचो रंग हलदी को ध्वे बेर नै जाना
बालकाला कासपड़ियां दुख रवे बै नै जान



Tara Singh Chuphal

कांठा है काभड़ काटो एंठ्या एठ्या बेर
में तुमरि माय राखूंलो गठ्या गठ्या बेर



Tara Singh Chuphal

सिलघड़ि का पाल चाला झुमुराकि नलि
नी देखिनी भल हुना देखियां कलि कलि



Tara Singh Chuphal

धान बोया धनाड़ि माटा ग्यूं बोया गिल में
दिन का चौबीस घंट तू म्यारा दिल में



Tara Singh Chuphal

हरियां काकड़ चिरो चकुवा दनल
म्यारा मुख किला चांछै मरिया मनल



Tara Singh Chuphal

आज लछिमा गैल गिवाड़ भवल लछिमा धुर
त्यर बचन सुण लछिमा म्यर प्राण झुर



Tara Singh Chuphal

रेशमी रुमाल मेरो छुपक्या धोये जाना
जति में बाटुलि लेलो उति रोये जाना



Tara Singh Chuphal

खाज गाल मिठ भैछ ऊखड़ गुदिल
मुखड़ि को रंग उड़ौ सौरास बुतिल



Tara Singh Chuphal

धुर भैंसी अड़कन लागि बगड़ सिरुकि
जो घड़ी समज ऊंछि मैं छाति चिरुछि

न्यौली संकलन



Jogasingh Kaira

हाङ्गि फ़ाङ्गि बैठ घुघूती घुर घुर बुलैछ
मैकुं देखि देखि घुघूती तेरी बाटी चैञ्छ। (स्वरचित)



Tara Singh Chuphal

सर्ग लागो काल बादल धरति पड़ी ओस
किसमत की लेख एसि कै लगौं दोष



Tara Singh Chuphal

कालि जंगार भैछ गोरि गंगा तरूल
कै जागा जनम लिछौं कै जाग मरूल



Tara Singh Chuphal

ठंडो पाणि कांक हुंछ कफर फुट्याक
भारी दुख क्याक हुछो दगडौं टुट्यांक



Tara Singh Chuphal

दाथुलि धौंकार दाथुलि धौंकार
च्यल हुनि थात खानि चेलिक कौंकार



Tara Singh Chuphal

दन्याली को दन दन्यालिको दन
बूढी जालि हाथ खुटि नि बुढी मन



Tara Singh Chuphal

शौक बैठो ढांकरै में शोक्यानि कातौ उन
दिन दिन सुखी ऊंछ शरीर को खून



Tara Singh Chuphal

(उल्टी न्यौली)
कै देश बुड़छ सरग शुकर तारा कै देश बुड़छ
शरीर ऊड़छ छिट घड़ी त्वे नै देखि शरीर ऊंइछ



Tara Singh Chuphal

कैलाश है जोगि आयो जोगि आयो ठांसलि
दिन दिन झुरि आयौं सासु का झांसलि



Hem Pant

गाड़ो गिलो, बल्द गल्या, एक गाड़ो बालो कि?
रुखा टुक्का कच्चा बांसछ, मेरो सुवा आलो कि?



Hem Pant

चावल भला बरमा का, ग्युं भलो पालि को
दांत भला भिनज्यू का, काजल सालि को।



Jogasingh Kaira

सासुले भात परोस ट्वट पड़िया पातमें
दिन भरि हँसने रयुं भौते रोयूं रातमें । (स्वरचित)



Rajen S. Sawant

सुनखोला सुनार रुनी, कुमूं में नबाब।
काँ जारोछा हो 'पांडे' ज्यू, दिनाकन जबाब।।



Nandan Pokhariya

काली गंगा बगी आयो सुनू को त्रिसूल
छाड़ी दिये घरबार, जन छाड़े ईस्कूल



Gopu Bisht

ठंडो पानी कां को हुंछो, काफर फुटियाँ को।
मैं बड़ मलाल रैगो, यो दगाड़ छुटियाँ को।



Nandan Pokhariya

नेपाल छतीस धारा पानी की तुड़क।
जै घड़ी समझ ऊँछी रवै ऊँछी दुड़क।

न्यूली संकलन



Nandan Pokhariya

किरमुली ले घोल लायो धरती कोरी कोरी।
चीन बेरी लइन आयो रात चोरी चोरी।।



Gopu Bisht

सूखा डाना घट जोतौ, ओ रिटल कसीकै।
में त्यार निस्वास लागौ, यो फीटल कसीकै।



Nandan Pokhariya

स्वर्ग हैं बजर पड़्यो भैंस का किल में।
मेरी माया राखी दिये अपना दिल में।



Gopu Bisht

ऐजा भैंसी कां जै रै छ, गाज्यो कुमरी में।
मैकै जाना छोड़े ईजा, यो बाली उमर में।



Mohan Pant

अस्कोटका ताल बजार, लाल माटा की सीढ़ी,
तुम त खांछा पान सुपारी, हम त पीनू बीड़ी



Mohan Chandra Joshi

क्याला खाया नारिंग खाया, के करूं खायां ले।
डीठ पड़छी भेट नै हुनी, के करूं माया ले।



Nandan Pokhariya

नारींग का बोट मुनी नारींग की बास।
माया ले भरी मन बिन माया उ दास।।



Nandan Pokhariya

हिमाल में घाम आयो बगड़ मे सेल।
कति कसो कति कसो कुदरती को खेल।।



Mohan Pant

ताल गाड़ा मडुआ बोयो, भालू ले बुकायो,
दाज्यू ले रूमाल दीयो, बौजी ले लुकायो.



Mohan Pant

ताल्ला गाड़ा बल्द जोत्या ल्यो बचुली ब्यू,
चाहा ल्याए, कटकी ल्याए, रोट में ल्याए घ्यू



Jogasingh Kaira

इकले धुर कसिक काटूं, दातुलि हैरे बज्यूणि
बिन दगड़े कसिक रनूं, मी नानी खड्योणि । (स्वरचित)



Jogasingh Kaira

कसि भागा बुलां रछे के करौछ कैले
गगासे कि पूवा बनि लूवा सारो मेंले।
त्यरलिजी बौलकरौ सुख निदेखो मेंले
नि पढले म्यर च्याला तूलै यसै रौले। (स्वरचित)



Jogasingh Kaira

द्वी मैलोक ठाड़ उकाऊ फिर बाइस फेर।
घर बटी इस्कूल द्वाराहाट हैई जैछी देर । (स्वरचित)



Anand Basera

उब जानी तीतरी का उन ऊनी खोज..
तू समझली कभै कभै मी समझूलो रोज।



Jogasingh Kaira

उकाऊ हुलार रोज हिटण खुट लागी पटाई।
त्यार दगड आजि निभुलो ठुम ठुम हिटाई। (स्वरचित)



Jogasingh Kaira

हँसने रया खेलने रया होई दिवाई सारी
आज रंग हमैकुं चढ़ भोव तुमरी बारी।
पैली रंग मी लगुंल फिर तुमारी बारी।
राम ज्यू लै रंग भरो फूलूं भरी क्यारी
हँसने रया खेलने रया उमर भर सारी। (स्वरचित)



Anand Basera

अलका धुरी मोष्ट्यामाणु बानर रूखारी..
मन मेरो हौंसिया छ यो करम दुखारी...

न्यौली संकलन



Anand Basera

गाड तरयूँ गध्यारा तरयूँ गंग ले तरूलो...
तू त सुवा बची रये मीआफी मरूलो।



Anand Basera

हयूनां दिन माखा लागणी चौमास मच्छर...
आग लागौ, भांग फुलौ, पडि जौ बज्जर..



Hem Pant

धारा में को ठुल रूख, सल्लो छ कि दल्लो
मेर सुवा को हिटन्या बाटो, तल्लो छ कि मल्लो??



Hem Pant

सुवा चड़ो पाणि पिछ, तलि गाड़ किनार,
हिरदि में लेखि ल्यूलो, सुवा की अनार।



Jogasingh Kaira

वारे ढाई ठण्ड लागो पारे ढाई पौन
बिन देखिये म्यर सुवा दुःख समझ निऔन (स्वरचित)



Bimla Joshi

सिलगढी का पाला चाला गिन खेलन्या गढो
तैं होये हिसालू तोप्पो में उड़न्या चढो



Rajji Basera

काटना काटना पलि ऊँछ, चौमासि को बन
थामी ज़ाँछ बगन्या पानी, नै थामिनो मन



Jogasingh Kaira

रुमाली का चार कुंच एक कुंच स्याई
किलै करी चिठ्ठी बंद किलै टोडी माई।



Rajji Basera

आसमानी ज़हाज ऊड़यो रंगुन डाक को
पँख हुना उड़ी उनु में बिना पाँख को



Jogasingh Kaira

चर बाकरी पात पतेल, नि चरे अङ्ग्यार
आदू गंगा छोड़ी गैछै, ना वारा ना पार



Jogasingh Kaira

काकडी को केरा, घटि घालो घेरा
भट्टी जैसो आग लैरो हिरदी भितेरा ।



Jogasingh Kaira

छिड़ो पाणि तुड़ तुड़, पाणी को मासिका
तू भूलड़ी भूली गैछै, मैं भूलूँ कसिका



Jogasingh Kaira

राति पर हाथ मोबाइल, फेस बुक व्याखूलि ।
आँख फोड़ा दिन भरी, लागी रयूँ बैखूली । (स्वरचित)



Jogasingh Kaira

बार बरस भाबर रयो, बन कमल धमल
क्वे कैहड़ी निबुलान, फेस बुकि अमल । (स्वरचित)



Jogasingh Kaira

आँख ताणी ताणि चैरै फेसबुक पारा
चुल पन साग जलो, भौ मारुरौ डारा । (स्वरचित)



Jogasingh Kaira

घड़ीया कुमर भागि घडिया कुमरा
औनेँ रनि दिन माँस निऔनी उमरा ।



Jogasingh Kaira

लाइक करो कोमेंट मारो इकें को देखलो।
म्यर हियामें वी बसल जो न्योली लेखलो । (स्वरचित)



Anand Basera

गाड की चिफली ढूँगी, कै ढूँगी तरूलो..
पहाड मा जनम मेरो, कै देश मरूलो।

न्यौली संकलन



Jogasingh Kaira

धोती मैली टोपी मैली ध्वेदिनेर छड़ना क्वे
जो मरी गोयो परदेसा रोई दिनेर छड़ना क्वे।



Nandan Pokhariya

उन खोली घास गयूँ काटी ल्यायूँ प्यौली।
आधा उमर होई गैछ कब आली ब्यौली।।



Jogasingh Kaira

हो हांग फांग झन काटे काटे झन टूका
ते जंगल देखि बेरा लागि जाँछो दुखा



Nandan Pokhariya

गोरू खोल्या गाठ्यूनी लाया, ले बाच्छी कूलकूली।
पूँल दुख भौत पढ़्या हे चढ़ी बुलबुली।



Nandan Pokhariya

भात खाये दाल खाये फाँणु खाये जन।
देश घूमी घर आये जोगी होये जन।।



Anand Basera

रुख की औखडी दानी, भीं किलै झडनी हौं..
कैको चेलो कैकी चेली, माया किलै पडनी हौं।



Nandan Pokhariya

आधा तली सेल आयो पीपली छाया ले।
दिन दिन दुबली भयूँ चर्खुली माया ले।।



Jogasingh Kaira

लुवाँक नाङ्गर मोड़ो तामांका तारों लै
कैको दिल निदुखुण् बोत्योण् इशारों लै।(स्वरचित)



Jogasingh Kaira

हाथों पे दातुली रखी रखी घाका लुट
ना कभें जबाब दीण् नि बलाण् झुट।(स्वरचित)



Basant Upreti

परदेश नें बसि गया भुल गयो संस्कार
ठंड पाणि फ्रीज नें छु, सेफ है गे भकार



Anand Basera

यां बटी का जाना जाना पुजी गयूँ शेरी...
बिरालू ले म्यांऊ करी, ओ ईजा हो मेरी...



Rajji Basera

हपुर बजानी धुरा बांज की हवा छ
आज का ज़ाईया भटी कभे की आवै छ



Anand Basera

गंगा ज्यू है बगी आयो लुवा को बगस..
उडभाड को मन बुझून्या को होलो सकस।



Jogasingh Kaira

हाई जुन्याली रात , यो जुन्याली राता
कैहैते कुनु दुःख सुख को सुनल हिये की बाता।



Anand Basera

सर्ग तारा भौत हुनी उज्याली जूनीं को,
दिन दिन रात रात ध्यान छ उनीं को



Nandan Pokhariya

ध्वज धूरी दमू बाज्या पक्या लाये पूरी।
चैत का महिना ईजू में लागी हि कूरी।।



Nandan Pokhariya

धारचूला का दार संगाला अस्कोट का अगाला।
जै घड़ी समझ ऊँछी दिल हो जाँछ पगाला।।

न्यूनी संकलन



Nandan Pokhariya

भात पकायो बासमती को साग करेली को।
मुख मटक्या जन जाये बाटो बरेली को।।



Jogasingh Kaira

ठुलठुलाले बौल खेलो नन ननाले गोली
इतु बड़ी मैस मिला कसिक भेट होली।



Rajji Basera

नेपाल छतिस धारा पानी की तुडुक
जै घड़ी समझ ऊछी रवै ऊछी घुडुक



Jogasingh Kaira

द्वि घुघूती बात करनी , बैठि बिजुली तार
मुख थिथाण भौत करनी क्वै क्वै मददगार ।



Rajji Basera

गंगा ज्यू का बगड़ में हरियो सरप
पाँख हुना उड़ी उनु में तेरा तरफ



गोपाल सिंह नेगी

छण छण आंसू आनी , परदेस जाड़ेले ।
रंगिल पहाड़ छूटो दूवी रोटी कारण ले।।



Hem Pant

हाथि मोटो, घोड़ो मोटो मल्ला खेतका जाँ ले
दिन काटू हंसि खेलि, राति त्यारा नाँ ले



Hem Pant

घास काट्यो घुलमुल, पुलि बादनि नें ऊनि
कै ले बाटि खोरि तेरि, कै ले गाड़ि स्युंणी



Jogasingh Kaira

रातोंले ओड़ी सुआ सितारों की साड़ी
कति रैगो मेरो हिया कति खेती बाड़ी। (स्वरचित)



Anand Awasthi

रहट की तान सुआ रहट की तान
कैकी करं मन कसी कैकी बान



Jogasingh Kaira

हो कास कासा चाडा बासनी गैलो पातला
कफुवा चड जब बासल पाकनी काफला।
पाकनी काफला, तू नक् बुलये झन।
एक डाल पर कोयल बोले एक डाल पर कागा
जस अपयस मिलूं भागि जसी जैकी भागा।
जसी जैकी भागा , तू नक् बुलये झन ।
झन खेलिया जुवा नि कया कुबचन
पाच भाई पांडव और कुंती बनेबन
आहा कुंती बनेबन नक् बुलाया झन



Anand Awasthi

कालो बनैन ढिल है गोछ लाल बनैन फिट
त्यार दगाड़ क्वे न्हाति म्यार दगाड़ हिट।



Jogasingh Kaira

तेरी मुरुली सुणि मोहना सुध बुध निरुनी
हियकी माया जुडी मोहना भेट किले निहुनी। (स्वरचित)



Jogasingh Kaira

तू गोरूंक ग्वाव मोहना ग्वाल दगड़े राया
कसिक बनू ग्वाल मोहना मेंकू बते जाया (स्वरचित)



Jogasingh Kaira

भुलिये झन मेरी भुली , हाथ कलम स्याई
तू लिखने रये भागि हमरी पहाड़े माई ।

न्याली संकलन



Bimla Joshi

हाथ धागुला चाँदी का छन कान् मुनाड़ा सुनका
सबका दुख साजा छन, म्यारा दुख कुनका



Jogasingh Kaira

पिरुवा बुनियां भागी पिरुव बुनियां
दुःख दुःख झन कये दुःख छू दूनियाँ



Bimla Joshi

डाणा में डांसी को ओखल खैर्या मुसल छ कि
में सोदन भूलि गयूं गात कुशल छ कि



Jogasingh Kaira

पिरुवा बुनियां भागी पिरुव बुनियां
दुःख दुःख झन कये दुःख छू दूनियाँ



Nandan Pokhariya

चर चर चनुली भैंसी, धारुणी को चरान।
धक धक हियो धड़क्यो, कसके जाला पापी परान



Jogasingh Kaira

हंसने रये हंसाने रये नि कोसिये भाग
भौत दुखी करीं भुला य पेटेकी आग । (स्वरचित)



Jogasingh Kaira

अजर अमर रौछ खैर गेठि सानण।
कुंण में बुलाण औछ नक् नि मानण ।(स्वरचित)



Rajan Rana

शिखर क उंच डानौ, हयुं पड़ौ पयांन
चिट्ठी पड़ी जेब धरी, लिफाफा सिरांन !



Rajan Rana

गाड़ तरी गधेरी तरी, को रौली तरूला,
पहाड़ै जन्म मेरो, को देश मरूला !



Jogasingh Kaira

बिछोंण दरिक बिछोण दारिक
समझण लेखी दिया उमर भरिक।



Mohan Chandra Joshi

लेख लेख बजार की छोरी हाथ जन हलकायै।
में धारा ढलकन्या बेर रुमाल हलकायै।



Anand Awasthi

यां बटी को हिटन हिटना पूजि गयूं डोटी
तेरि माया ल्हिजा कूंछियूं खल्दि हगे टोटी।



Anand Basera

यां बटी को हिटन हिटना पूजि गयूं बुंगां..
बुंगां वालनि एक दुंगां हाणी, झडग्या म्यारा जुंगां।



Jogasingh Kaira

नानि बेली जुठी रैगे पालिंगे सागेकी
मी चैली किहुणि सैतो पराई भागे की



Jogasingh Kaira

कसिक भुलुलौं इजू, में मैतो मुलुक
म्यर घर मिहणि हैगो पराई मुलुक (स्वरचित)



Jogasingh Kaira

में तो ईजा बनेल्युल सरासे की सासू
मेरी इजा जब रौली को पोछल आँसू (स्वरचित)



Jogasingh Kaira

छुणकैली दातुली दातुलि धरो पयाण।
झन भुलिये भुली मेरी पहाड़े पछ्याण। (स्वरचित)



Hem Pant

चमचम चमकि रैछ, तेर नाककि फुलि
धार में देखनि भै छे, जनि दिशा खुलि



Rajen S. Sawant

धार में देप्ता को थान, खै हाल्यो प्रसाद,
में त ज्वाड़ा भुली गैछ्यौं, जगै हैचा याद।



Rajen S. Sawant

अल्का धारा पानि भारन्या, चेली हो बिष्ट कि,
यो पैलो आंखर मेरो, आफना ईष्ट कि।



Tara Singh Chuphal

बाटै में दुकान हाली भोटिया शौकलि
तुमि संग भेट भैछ फेसबुका मौकालि



Godhan Singh Bisht

गोरख्या पल्टन टेडी टोपी पुलिसा पगड़ी !
जतिला (जहाँ) मरन होलो दुस्मना दिगडी !

हपुरा बजाडी धुरा बाँजाकि हवा छो
आज का जायाना बटी कैबा अवा छो

काल कला काफला टिपा सुकिली ओडनिया में
में बटुली झन लगाये चौमासी गोडनिया में !

तेरी हाथा सिसा कि चुडी बाजि खनै खन !
ते सुवा कै चान चानै न भरीनै मन!

बगसा बम्बइया तालि न तालि खुलनि
तेरी फोटका मेरि बटुवा न मुखा बोलनि।



Tara Singh Chuphal

बनै काटो बनै ताछो सलाको भराण
ऋतु कैसि सुणा ग्यैछा पन्त ज्यू जी रवो प्राण



Rajen S. Sawant

ऊना खोली बाटो लायो, तुड़ तुड़या पानि ले।
त्यारा गौं को हयाला भयूं, हसन्या बानि ले।।



Rajen S. Sawant

भात पकून्या ताँमै तौली, पस्कून्या चमच,
तमारो आंखर म्यारा, नि आई समझ।
उड़ पन्छी हरेवा स्याप, बस पन्छी गरुड़,
जे आंखर तम कौला, फरकूलो जरुड़।



Rajen S. Sawant

घास फूस को छान बनायो, जेको पाखो चूँछ,
नान छना का खेल्या खेल, हिमू, आब ज क्य हूँछ।



Hem Pant

चमचम चमकि रैछ, तेर नाककि फुलि
धार में देखनि भै छे, जनि दिशा खुलि।



Tara Singh Chuphal

गंगा कुंछि बगूं बगूं, पिथि कुंछि घुमूं
एक थालि में खानो खूलां, में डोटि तें कुमूं



मा० सांसद राज्यसभा
श्री प्रदीप टम्टा जी द्वारा
'क्रिएटिव उत्तराखण्ड' द्वारा
आयोजित

'15 दिवसीय लोक नाट्य
कार्यशाला' के शुभारम्भ के अवसर
पर लोकार्पित

दिनांक - 27 मई 2018, रुद्रपुर

भूख लागलि भोजन खाया, घाम लागलो बै जया

बचि रूला भेट होलि, सुकार्या रै रया।

भावार्थ - भूख लगेगी खाना खा लेना, धूप लगे तो बैठकर आराम कर लेना

जिन्दा रहेंगे तो आपसे भेंट जरूर होगी, आप सकुशल रहना